

**Inissianik attartortitsisarneq pillugu Inatsisartut peqqussutaata nr. 2, 12. maj 2005-imeersup UPA 2017-mi allanngortinneqarnissaa pillugu Naalakkersuisut suliniuteqaqqullugit inatsisartut aalajangiiffigisassaattut siunnersuut. Taamaaliornikkut atorfirmut atatillugu inigisap sivikinnerpaamik ukiuni tallimani attartoreerneratigut attartortup nalinginnaasumik attartukkatut inigilersinnaaqullugu.**

(Inatsisartunut ilaasortaq Anthon Frederiksen, Partii Naleraq)

### **Akissuteqaat**

(Ineqarnermut, Sanaartornermut Attaveqaqatigiinnermullu Naalakkersuisoq)

### **Aappassaanneerpeqarnera**

Naalakkersuisut sinnerlugit Sanaartornermut Ataatsimiititaliaq isumaliutissiisuteqarnerani qutsavigaara.

Isumaliutissiisut naapertorlugu Sanaartornermut Ataatsimiititaliaq isumaqatigiisooq sulisut sulisunut inissiani ukiuni tallimani najugaqareernerminni, sulisunut inissiamik najukkaminnik inissiatut nalinginnaasutut tigusinissamut pisinnaatitaaffeqalernissaannut siunnersuummut tapersiivoq.

Naalakkersuisut piffissap ukiunit arfineq marlunniit ukiunut tallimanut allanngortinneqarnissaanut akerliliinissaq kissaatiginnilaat.

Kisiannili immikkoortup suliarineqarnissaa upernaakkut ataatsimiinnermiit ukiakkut ataatsimiinnermut kinguartinneqarsimammat, piffissaq eqqarsaatigalugu UPA 2017-imut allannguutissatut siunnersuummik saqqummiussisoqarnissaanik siunnersuuteqarnerup akuerineqarnissaa ajornakusooramat Naalakkersuisunit erseqqissaatigineqassaaq.

Akilerartarnermik ineqarnermillu aqqissuusseqinnissap UPA 2018-imi saqqummiunneqarnissaa Naalakkersuisut pilersaarutigaat. Attartortitsisarnermut Peqqussutip iluarsaanneqarnissaa tassunga ilaassaaq. Taamaattumik Attartortitsisarnermut Peqqussutip tamarmiusup iluarsaanneqarnerata UPA 2018-imi saqqummiunneqarnissaa Naalakkersuisut sulissutigaaq. Tamatuma saniatigut attartortitsisarnermut inatsimmi attartortut naapertuuttumik illersorneqarnissaat eqqarsaatigineqartussaavoq, taamaattumillu siammasissumik tusarniaassutigineqartussaalluni.

Taamaattumik attartortitsisarnermut inatsimmut nutaamut tassungaluunniit allannguutissanut siunnersuut siusinnerpaamik UPA 2018-imi saqqummiunneqarsinnaavoq, tamanna sioqqullugu ineqarnermik soqutigisaqartunit ineqarnermut politikikkut oqariartuutinik pissarsiniarfineqartussaammata.

Kiisalu aningaasaqarnermut kingunerisassaasinnaasut paasiniarneqartussaapput, aningaasanullu inatsisissamut tulliuttumut, ukiakkut ataatsimiinnermi suliarineqartussamut ilanngunneqartussaallutik

Tamakku peqqutigalugit Naalakkersuisut siunnersuut itigartinneqassasoq inassutigaaq.